

Inatsisartut suleriaasianni § 37, imm. 1 naapertorlugu, matumuuna Naalakkersuisunut imaattunik apeqquteqarpunga:

Naalakkersuisunut apeqqutit:

1. Upernavimmi napparsimaviup ulloq unnuarlu tamakkiisumik ingerlanissaa qulakkeerniarlugu Naalakkersuisut maannakkut qanoq iliuuseqapallanniarpat?
2. Naalakkersuisut qanittukkut ungasinnerusukkullu nakorsat, peqqissaasut peqqinnissaqarfimmilu sulisut allat atorfinitsinneqarnissaat sulisoriinnarnissaallu qanoq qulakkeerniassavaat?
3. Kiffartuussinerup ajorseriaqqinnginnissaa suliasalluunniit pingaarutillit unitsinneqarnissaat pinngitsoortinniarlugu Naalakkersuisut immikkut aningaasaliissuteqarniarpat?
4. Naalakkersuisut qanoq qulakkeerniarpaat nunaqarfiit qulingiluat eqqissisimasumik piffissarlu eqqorlugu nakorsiarsinnaanissaat?
5. Naalakkersuisut neriorsuuteqassappat napparsimavik ulloq unnuarlu napparsimaviinnaanngitsoq ulluinnarni (8-16) ammasoq, kisiannili ulloq unnuarlu peqqinnissaqarfimmik ajoqusersimasut uninngaviannik peqartoq, ingerlaannassasoq.

(Inatsisartunut ilaasortaq Isak Johannessen, Naleraq)

Tunngavilersuutit:

Upernavimmi napparsimavik maannakkut immikkut ittumik ajornartorsiorpoq sulisussaaleqinerup annertuup saniatigullu sipaarniuteqarnerup kingunerisaanik, aaqqissuussineq eqqorneqareersimasoq sulis sakkortunerusumik eqqugaassaaq. Taamaattumik ernumassutikka saqqummiuppakka tamannalu pillugu apeqquteqarusullunga. Nakorsat, peqqissaasut peqqinnissaqarfimmilu sulisut allat amigaataapput, tamatumalu kingunerisaanik sullissineq annikilleriarujussuarpoq, taamaalillunilu nakorsiartitsisarneq pinaveersaartitsinermillu suliniutit sulis annikillisinneqariaannaallutik. Tamanna Upernavimmiinnaanngitsoq aammali nunaqarfinni qulingiluanis peqqinnissaqarfimmik pisariaqartitsiffiusuni eqquivoq.

Nakorsaatit nunaqarfinnut nassiunneqartarput sulisullu pisariaqartitsisut oqarasuaatikkut nakorsiartitsinikkut ikiorneqartarlutik.

Maanna ukiulermat nunaqarfinnut anngunnissaq ajornakusoortorujussuuvoq.



Taamaattumik tupigusuutigaara ukiup taamaalinerani nakorsaatiniq allanillu amigaateqartartoqalereersoq, ukiunnginnerani nakorsaatissat naammatut qulakkeereertussaagaluarmata.

Tamanna pissutsit aaqqissuussaannerata tatineqangaarneranut ersiutaavoq.

Upernavimmilu paasivara røntgeni ajoquteqartoq.

Tamanna Upernavimmi nunaqarfinnilu najugallit paasinaqisumik toqqissisimajunnaarnerannut pissutaavoq.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.